

Dewan Rakyat lulus laporan awal PSC pilihan raya
The Malaysian Insider
01 Disember, 2011

KUALA LUMPUR, 1 Dis – Dewan Rakyat meluluskan laporan awal jawatankuasa pilihan khas Parlimen mengenai pilihan raya – yang mengandungi lebih 10 syor termasuk penggunaan dakwat kekal.

Pengerusi jawatankuasa Datuk Seri Maximus (gambar) berkata beliau menjangkakan Suruhanjaya Pilihan Raya (SPR) boleh menyediakan dakwat kekal dalam masa dua bulan.

Bercakap kepada pemberita, kata beliau, penggunaan dakwat kekal hanya memerlukan perubahan kecil dalam undang-undang.

“Sasaran saya hanya dua bulan. Peguam Negara sudah ada draf. Hanya perlukan dua bulan untuk diluluskan oleh Kabinet dan Agong,” kata beliau selepas Parlimen menerima laporan awal bagi tujuan memperbaiki sistem perjalanan pilihan raya.

Katanya, agensi-agensi kerajaan terlibat dalam pembaharuan terlibat akan diberikan masa hingga Jumaat ini untuk datang dengan jadual pelaksanaan.

Katanya, SPR juga perlu menggariskan keperluan kewangan dan sumber manusia untuk menggunakan dakwat kekal dalam pilihan raya umum yang dijangkakan dalam waktu terdekat.

Ongkili berkata jawatankuasa itu akan mengadakan empat sesi pendengaran awam bermula Jumaat depan bagi mendapat maklum balas daripada semua pihak berhubung perkara itu.

Katanya, jawatankuasa itu juga akan meneliti perkara-perkara yang dibangkitkan dalam pendengaran awam dan di Dewan Rakyat ketika ia dibentangkan sebelum ia dimuktamadkan.

Katanya, laporan akhir berhubung penggunaan dakwat kekal dijangka siap sepenuhnya 3 April depan.

Sembilan usul lagi yang dibentangkan termasuk pengundi awal dan pengundi yang berada di luar negara akan mengambil sedikit masa kerana melibatkan penambahbaikan beberapa agensi.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/dewan-rakyat-lulus-laporan-awal-psc-pilihan-raya/>